

性理大中

性理大中卷之十

錢塘應撝謙嗣寅父編集

河陽趙士麟玉峯父鑒定

人性

所謂德性  
唯人所獨

明道程子曰民受天地之中以生。天命之謂性也。人之生也。直理亦如此。

撝謙曰。按民受天地之中以生。所謂命也。二語出左傳。劉康公極分明。疑此是前聖之言。康公述之耳。湯誥維皇上帝降衷于下民。若有恒性。衷字卽

中德之在內者。知此旨。其來遠矣。

又曰。生之謂性。性卽氣。氣卽性。生之謂也。人生氣稟。理有善惡。然不是性中元有此兩物相對而生也。有自幼而善。有自幼而惡。是氣稟有然也。善固性也。然惡亦不可不謂之性也。

楊謙曰。惡只可謂所稟之偏。不可謂之人性。蓋人性者。中氣未發之名也。惡不謂之人性。卽惡不可謂之中。

蓋生之謂性。人生而靜。以上不容說。纔說性時。便已

不是性也。凡人說性。只是說繼之者善也。孟子言人性善是也。

馮謙曰。此段分明。

夫所謂繼之者善也者。猶水流而就下也。皆水也。有流而至海。終無所污。此何煩人力之爲也。有流而未遠。固已漸濁。有出而甚遠。方有所濁。有濁之多者。有濁之少者。清濁雖不同。然不可以濁者不爲水也。

馮謙曰。天地一氣流行。化生萬物。其中者爲人性。偏者爲物性。中中之偏。爲人近物之性。受中受偏。

一齊賦來其先後甚微。以水喻性。天命之。正是太玄無味之初。如雪雨之味。因地變味。則如氣質之兼有善惡。至流而被污。則是在繼善之後所爲習染。今以水流被污。喻性之有惡。并謂濁者不可不謂水。其說未盡。○水出地中。其無味之味。寓於因地之味。

如此則人不可以不加澄治之功。故用力敏勇則疾。清用力怠緩則遲。清及其清也。則却是元初水也。亦不是將清來換却濁。亦不取出濁來置在一隅也。水

之清則性善之謂也。固不是。善與惡在性中爲兩物相對各自出來。

撝謙曰。二程子語錄。明道在時。大抵不別。唯劉質夫所記。皆明道語。餘者雜記。一二伊川壽考語錄爲多。今性理大方。一切合之。以二先生之道同也。然言性處。微有所異。如明道語。民受天地之中以生。天命之謂性也。二句截然了當。及觀呂與叔記。二先生語。有謂天命之謂性。率性之謂道。通人物而言。馬則爲馬之性。牛則爲牛之性。此所謂率性

也。人在天地之間。與萬物同流。天幾時分別出。是人。是物。則與此二語。若不相似。然民受天地之中以生。不可謂物。受天地之中以生也。子思恐人趨於偏。故作中庸示人。謂人之性中。率之可以爲道。萬世通行。若禽獸之性。只因偏了。便行不去。爲人所治。此是作中庸本旨。斷不可兼人物言也。李端伯記二先生語曰。天地之間。非獨人爲最靈。自家心卽鳥獸草木之心也。但人受天地之中以生。爾觀此一段。可見與叔所記。非定說也。觀明道此段。

語與答子厚定性書皆不以爲性卽是理但分晰未明只以惡喻流入水中之泥沙解相近之氣稟則在氣稟之內已不全善在氣稟之外又屬何物故伊川斷然歸之理曰性卽理也夫凡民氣質未生理於何寄氣質旣生理已玷闕天人相賦之際不無更有毫釐之差矣○先儒多不知善惡之所由來善者由人性得氣之中惡者只是過中而不肯返耳如飲食以禦飢渴是人性過飽則害生又過而求美則貪而入於惡又過而致師訟惡之



甚矣。男女之和生子者。是人性。過則淫而入於惡。過極而亂。惡之甚矣。凡此多由習之惡。有始生聞聲而可知其惡者。亦是過中之氣耳。如過剛過柔皆是也。凡善之過極。卽是惡。如好生之過而放毒獸。戒淫之過而絕父子。皆非人性也。以皆非中也。○觀二先生語錄曰。論性不論氣。不備。論氣不論性。不明。二之則不是。又或曰。某欲以金作器。比性成形。曰。金可以比氣。不可以比性。此二段已似分理氣。不知性卽理之說。明道晚年已同之耶。抑猶

自伊川始也。

性卽氣一段遺書亦在端伯所記二先生語中。近思錄竟歸之明道。朱子

想有所傳也。

伊川程子曰。性卽是理。理則堯舜至於塗人一也。

撝謙曰。天命之性。是民受天地之中氣。以其靜而未發。則謂之性。卽中庸所謂德性也。仁義禮智之理。卽中氣所具之德。中庸曰。成己仁也。成物智也。性之德也。凡伊川與朱子所言之性。皆只就性之德上說。不兼氣說。然天生蒸民。有物有則。性仍屬物。則方是理。

又曰。天地儲精。得五行之秀者爲人。其本也。真而靜。其未發也。五性具焉。曰仁義禮智信。形既生矣。外物觸其形而動於中矣。其中動而七情出焉。曰喜怒哀懼愛惡欲。情既熾而益蕩。其性鑿矣。

楊謙曰。按五性之說。見於白虎通。曰五性者何。謂仁義禮智信也。仁者不忍。好生愛人。義者宜也。斷決得中。禮者履也。履道成文。智者知也。不惑見微。信者誠也。專一不移。故人生而應八卦之體。得五氣以爲常。仁義禮智信是也。此其說必有所傳矣。

故韓子說所以爲性者五。而人之得性者有三等。上知下愚中人。其實不啻有萬等也。禮運曰。何謂人情。喜怒哀懼愛惡欲七者。弗學而能。樂記曰。人生而靜。天之性也。感於物而動。性之欲也。物至知知。然後好惡形焉。好惡無節於內。知誘於外。不能反躬。天理滅矣。伊川所論。蓋本此。○何以知經之言性。非指理也。性與情爲體用者也。性靜而情動。猶夜靜而晝動。未有夜屬理。而晝屬氣也。理在性中。謂之仁義禮智。其發而爲惻隱恭敬羞惡是非。

之情。仍謂之仁義禮智。故理無動靜。無未發已發者也。凡中庸所謂未發。樂記謂人生而靜。天之性也。皆指氣而言。

又曰。孟子言性善。是性之本。孔子言性相近。謂其稟受處不相遠也。人性皆善。所以善者。於四端之情可見。○問生之謂性。與天命之謂性。同乎。伊川曰。性字不可一槩論。生之謂性。止訓所稟受也。天命之謂性。此言性之理也。今人言天性柔緩。天性剛急。皆生來如此。此訓所稟受也。若性之理也。則無不善。○問性

相近也。習相遠也。性一也。何以言相近。曰。此只是言氣質之性。

撝謙曰。性只是中。而受中有厚薄。然亦相近。非天命之性爲理。而又有相近之性爲氣質也。

張子曰。形而後有氣質之性。善反之。則天地之性存焉。故氣質之性。君子有弗性焉。

撝謙曰。孟子曰。形色。天性也。今張子言形而後有氣質之性。故氣質之性。君子有弗性。是不以踐形爲貴。而以賤形爲說矣。不知民受天地之中。亦形

而後有也。

朱子曰。性所謂善者。無惡之名。○韓子說所以爲性者五。而今之言性者。皆雜佛老而言之。所以不能不異。在諸子中。最爲近理。蓋如吾儒之言。則性之本體。便只是仁義禮智之實。如佛老之言。則先有个虛空的性。後方旋生出四者來。不然。亦說性是一个虛空的物。裏面包得四者。今人却爲不曾曉得自家道理。只見他說得熟。故如此不能無疑。又纔見說四者爲性之體。便疑實有此四塊之物。磊塊其間。皆是錯看。

了也。須知性之爲體不離此四者。而四者又非有方所形狀。可撮可摩也。但於渾然一理之中。識得個意思情狀。似有界限。而實亦非有牆壁遮欄分別處也。然此處極難言。故孟子亦只於發處言之。如言四端。又言乃若其情。則可以爲善之類。是於發處教人識取。不是本體中元來有此。如何用處。發得此物出來。但本體無著摸處。故只可於用處看。便省力耳。

爲謙曰。凡朱子所謂性之體。皆作性之德看。自分明。若性之體。只是中氣一氣變化。又有中精中氣。



之別。○所謂佛老之言。乃是儒之入於佛老者。若佛老之說。則未嘗言性中有仁義禮智。

問性者。道之形體如何。朱子曰。諸先生說這道理。却不似邵子說得最著實。這個道理。纔說出。只是虛空。更無形影。惟是說性者。道之形體。却見得實有。不須談空說遠。只反諸吾身求之。還是實有這個道理。還是無這個道理。故嘗曰。欲知此道之實有者。當求之吾性分之內。

朱子答胡廣仲曰。天命之性。只以仁義禮智四字言。

之最爲端的。率性之道。便是率此之性。無非是道。亦離此四字不得。如程子所謂仁性也。孝弟是用也。性中只有仁義禮智四者而已。曷嘗有孝弟來。此語亦可見矣。蓋父子之親。兄弟之愛。固性之所有。然在性中。只謂之仁。而不謂之父子兄弟之道也。君臣之分。朋友之交。亦性之所有。然在性中。只謂之義。而不謂之君臣朋友之道也。推此言之。曰禮曰智。無不然者。○答林擇之曰。靜字乃指未感本然言。蓋人生之初。未感於物。一性之真。湛然而已。豈非常體本然。未有

不靜乎。唯感於物。是以有動。然所感既息。未有不復其常者。故常以爲靜者。性之真也。

撝謙曰。數段分晰甚明。人性之所以貴於天地者。以有仁義禮智之德。故論語所言。唯舉仁義禮智之理而已。今所言性非理者。是原其載理之質。若舍理而言氣。則是養生家之說。而非立人極之本旨矣。

按朱子大全論定後。所記與胡廣仲論性曰。當時酬對如論性無不該。不可專以靜言。此固是也。然其說

當云性之分雖屬二靜。而其蘊則該動靜而不偏。故樂記以靜言性則可。如廣仲遂以靜字形容天性之妙則不可。如論程子真靜之說以真爲本體。靜爲未感。此亦是也。然當云下文所謂未發卽靜之謂也。所謂五性卽真之謂也。然則仁義禮智信云者。乃所謂未發之蘊。而性之真也歟。

爲謙按朱子此一條以性之分爲靜而未感。其蘊爲五性。此較分明矣。不若竟言心之體爲性。靜而未感。性之德爲仁義禮智。信則尤明白耳。

又曰。性卽理也。當然之理。無有不善者。故孟子之言性。是指性之本而言。然必有所依而立。故氣質之稟。不能無淺深厚薄之別。孔子曰。性相近也。兼氣質而言。○性只是搭附在氣稟上。○性之爲理。不離氣而爲言。不雜氣而爲言。只就氣上指出理。

撝謙曰。皆是祖伊川性卽理也之說。陽明不喜考亭至言性亦曰。性之體。卽是天理。蓋性至難言。見得已。性分明。天地萬物之性。一以貫之矣。又曰。未發以前。氣不用事。故有善而無惡。

撝謙曰。未發以前。氣不用事。獨不曰理亦不用事乎。未發只是渾然一氣。亦是渾然一理。若以未發爲理。已發爲氣。失之遠矣。○未發只是未過中。故無惡。孟子指發之初。念言性善。亦只是未過中。故無惡。

朱子曰。人之性皆善。然有生下來善的。有生下來惡的。此是氣稟不同。且如天地之運。萬端而無窮。其可見者。日月清明。氣候和正之時。人生而稟此氣。則爲清明渾厚之氣。須做個好人。若是日月昏暗。寒暑反

常皆是天地之戾氣。人若稟此氣。則爲不好的人。何疑人之爲學。却是要變化氣稟。然極難變化。如孟子道性善。不言氣稟。只言人皆可以爲堯舜。若勇猛向前。氣稟之偏自消。功夫自成。故不言氣稟。看來吾性旣善。何故不能爲聖賢。却是被這氣稟害。如氣稟偏於剛。則一向剛暴。偏於柔。則一向柔弱之類。人一向推托道氣稟不好。不向前。又不得。一向不察氣稟之害。只昏昏地去。又不得。須知氣稟之害。要力去用功克治。裁其勝而歸於中。乃可。濂溪云。性者剛柔善惡。

中而已。故聖人立教。俾人自易其惡。自至於中而止矣。

撓謙曰。此段示學者用功切要之處。然要知天命之德性。亦是氣稟所具。只是氣稟有偏。方爲害。不可但謂氣稟害事。○人之氣質。不唯因於天時。亦且因乎地氣。予向與陳子際叔論之。際叔諱廷會。錢塘人。其來書曰。頃聞受中之旨。微言疊疊。至四海準性高明。微有異同。臥思其理。亦頗有可辨者。教以函夏所稟得氣。最中四裔荒遠。固於偏道誠如台旨。是



習尚詭齊。非關厥性。伯益山經。自招播以下。方風  
不一。然未聞有屠母食子。如豺虎破鏡者。普天之  
下。具有秉彜。赤縣神州。豈其專篤。東西聖人。不言  
可知。况八條之法。可施朝鮮。居彘之嘆。實出宜聖。  
聖人有作。誰曰不然。若夫懸表定中。此司徒之法。  
以便貢賦。攘彘舉號。此麟經之旨。以奉一王。俱非  
底允。執之微。揆界生之本也。故劉康一言。特齊兩  
氣。子思首義。唯淪四情。達者論中。如是而已。執彼  
論此。恐難豁然。故以僕而論。習俗移人。非關戎至。

人生而靜。何有夏彝。堂堂乎天。覆幬何憚。而拘遠哉。必不然矣。蠡測之議。敢以再申。何如何如。橋謙答之略曰。伏讀來章。文辨兼美。但弟此言。非敢苟爾。書曰。惟皇上帝。降衷于下民。若有恒性。子曰。天地之性。人爲貴。蓋以萬物皆有性。唯民受天地之中。是爲貴也。東方鱗蟲。龍爲長。南方羽蟲。鳳爲長。西方毛蟲。麟爲長。北方介蟲。龜爲長。中央倮蟲。聖人爲長。倮蟲雖皆中氣。不如聖人之最靈。故聖人爲長也。然則人之性。靈而中也明矣。聖人知人性。

之中也。故味有五而以稼穡作甘爲貴。音有五而以宮爲主音。色有五而以黃中爲美之至。方有五而以中夏爲正。一切言行政教皆以去偏就中爲善。聖人非不欲四海之外皆協中也。無如五方之民各得中國之一偏。剛柔輕重遲速異齊。先天之氣質旣異。則其後所習之安居和味利用備器各有所安。是以修其教不易其俗。齊其政不易其宜。聖人居夷亦難盡以中夏之法施之。去其太甚而已。遠至海外奇肱反肘兩面一臂不可謂盡無則

其氣質大異。其性視孔孟。豈能無小闕哉。所謂習者。因性而加。非性所本無。而能強之也。素者可染。而黃。皂漆不可得而白也。故子曰。唯上知與下愚不移。記曰。五方之民。各有性也。不可推移。此之謂也。然而性有萬等。何也。一方之中。又有五方。河魚不得明目。限於地也。一時之中。又有五令。穉稼不得育時。限於天也。父母之合。又有五性。燕雀不得生。鸛限於人也。上知之人。既知已性之中。又因其性之近中者。化而易之。不近中者。法而禁之。必不

中之下愚。逆之寄棘之外。不與同中國。此天下之  
所以長治也。然則性有不可變乎。曰。孔子所謂上  
知與下愚不移是也。苟非二者。易地而漸漬之。則  
化矣。東西聖人。本在九州之內。不聞四海之外。制  
禮作樂。允執其中。能如堯舜者也。佛教至自西竺。  
歷代奉以爲聖。然其偏亦可見矣。箕子八條之法。  
朝鮮以治。未聞禮樂精微與中國成均埒也。後世  
儒者謂孟子言性善。孔子言性相近。遂以此疑孟  
子之言。是知性之善而不知受善之有差等也。盡

性者。盡其變也。類族辨物。聖人之教。審異而致同。非謂人性皆齊也。今以性爲理。一入胎質。遂爲氣質之性。是天命之性。直是天下之虛理。豈得曰人性乎。敢以質之。

北溪陳氏曰。天所命於人。以是理本只善而無惡。故人所受以爲性。亦本善而無惡。

撝謙曰。凡人之惡。皆是受氣之偏。不可謂天之所賦有善無惡。但不是天所賦之人性。

孟子道性善。是專就大本上說來。說得極親切。只是

不會發出氣稟一段。所以啓後世紛紛之論。蓋人之所以有萬殊不齊。只緣氣稟不同。這氣只是陰陽五行之氣。如陽性剛。陰性柔。火性燥。水性潤。金性寒。木性溫。土性遲重。七者夾雜。便有參差不齊。所以人間所值。便有許多般樣。然這氣運來運去。自有箇貞元之會。如曆法算到本數。奏合所謂日月如合璧。五星如連珠時相似。聖人便是稟得這貞元之會來。然天地參差不齊之時多。貞元會合之時少。如一歲間。極寒極暑。陰晦之時多。不寒不暑。光風霽月之時極少。

最難得恰好時節。人主多是值此不齊之氣。如有一  
等人非常剛烈。是值陽氣多。有一等人極是軟弱。是  
值陰氣多。有人躁暴忿厲。是又值陽氣之惡者。有人  
狡譎姦險。此又值陰氣之惡者。有人性圓一撥便轉。  
也有一等極愚拘。雖一句善言也說不入。與禽獸無  
異。都是氣稟如此。陽氣中有善惡。陰氣中亦有善惡。  
如通書所謂剛善剛惡。柔善柔惡之類。不是陰陽氣  
本惡。只是分合轉移。齊不齊中。便自然成粹駁善惡  
耳。因氣有粹駁。便有賢愚。氣雖不齊。大本則一。



撝謙曰。此說氣稟甚備。其說聖凡得氣處甚。是然。細詳之。只說聖凡之異處。是氣稟。不說聖凡之同處。亦是氣稟。則似聖人爲受中。凡民卽不受中。而其所謂大本者。不過如下文之所謂理。於天命賦物處未明。不知天以中氣生人。偏氣生物。中氣之中。又有中之中。中之偏。有中之中之偏。有中之偏之中。其氣萬變。則其得理之偏全。亦萬變。而所以得爲人。而異於物者。皆以受中故也。中無不善也。雖極惡之人。如越椒之生。而聲如豺狼者。無不受

中不受中。則不得爲人矣。知此則凡謂性惡者。猶言中偏不成說話。

雖下愚亦可變而爲善。然工夫最難。非百倍其功不能。故子曰。人一能之。已百之。人十能之。已千之。果能此道。雖愚必明。雖柔必強。正謂此耳。自孟子不說到氣稟。所以荀子便以性爲惡。楊子便以性爲善。惡混。韓文公又以爲性有三品。都只是說得氣。近世蘇氏東坡。又以爲性未有善惡。五峰胡氏。又以爲性無善惡。都只含糊。就人與天相接處。捉摸說個性是天生。

自然的物。更不會說得性端的。指定是甚的物。直至二程得濂溪先生太極圖發端。方始說得分明極至。更無去處。其言曰。性卽理也。理則堯舜至於塗人一也。此語最是簡切端的。如孟子說善。善亦只是理。但不若指認理字。下得較確定。胡氏看不徹。便謂善者只是贊嘆之辭。又誤了。既是贊嘆。便是那個是好物。方贊嘆。豈有不好物而贊嘆之耶。程子於本性之外。又發出氣稟一段。方見得善惡所由來。故其言曰。論性不論氣不備。論氣不論性不明。二之則不是。蓋只

論大本而不及氣稟則所論有欠闕未備。若只論氣稟而不及大本。便只說得粗的。而道理全然不明。千萬世而下。學者只得按他說。更不可改易。

撓謙曰。五常之性。其傳舊矣。至程朱始發明精粹。後學豈敢故相牴牾。但所謂性只是理。附在氣上之說。未免毫釐千里之差。是以不敢辭其僭妄。一爲辨釋。蓋馬性健。牛性順。健順本天地之理。而不專屬之牛馬。馬之所以健。牛之所以順。其得之於天地之氣者。是其性也。人備衆善。其所以得衆善。

是受氣有異於物而得中者。是其性也。然則人性之善。正以氣質而謂氣質害之。可謂誤矣。

問氣質有清濁不同。朱子曰。氣稟之殊。其類不一。非但清濁二字而已。今人有聰明。事事勝者。其氣清矣。而所爲未必皆中於理。則是其氣不醇也。有謹厚忠信者。其氣醇矣。而所知未必皆達於理。則是其氣不清也。推此求之。可見。○又曰。人性雖同。稟氣不能無偏重。有得木氣重者。則惻隱之心常多。而羞惡辭讓是非之心。爲其所塞而不發。有得金氣重者。則羞惡

之心常多。而惻隱辭讓是非之心。爲其所塞而不發。水火亦然。唯陰陽合德。五行全備。然後中正。而爲聖人也。○問人有敏於外。而內不敏。又有敏於內。而外不敏。莫是氣稟強弱。曰不然。淮南子云。金水內明。曰火外明。氣偏於內。則內明。氣偏於外。則外明。○又曰。氣稟所拘。只通得一路。極多樣。或厚於此。而薄於彼。或通於彼。而塞於此。有人能盡通天下利害。而不識義理。或工於百工技藝。而不解讀書。或知孝於親。而薄於他人。如明皇友愛諸弟。長枕大被。終身不變。然

而爲君則殺其臣。爲父則殺其子。爲夫則殺其妻。便是有所通。有所蔽。是他性中只通得一路。故於一處皆碍。也是氣稟也是利害昏了。○問以堯爲父而有丹朱。以鯀爲父而有禹。如何。曰這箇又是二氣五行交際運行之際。有清濁。人適逢其會。所以如此。

馮謙曰。受中者。人性之同。以上所論諸條。乃同中之異。皆性也。皆氣質也。二之則不是。○性雖同中。有異。然當喜怒哀樂之未發。雖惡人未有不中。則未有不善。此卽異中之同。所謂性善者。當察於此。

○記曰。方以類聚。物以羣分。則性命不同矣。又曰。五方之民。各有性也。不可推移。孟子曰。犬之性。猶牛之性。牛之性。猶人之性。與。彖傳曰。乾道變化。各正性命。不曰共正。而曰各正。此吾儒之言性。所以爲同而異也。後人惑於釋氏。謂天下無不同之性。誤矣。○君子不言無情之性。恐善惡之無別也。○記曰。人生而靜。天之性也。物之成性。本在復前時。至而動。已屬於情。故孟子曰。乃若其情。則可以爲善矣。乃所謂善也。○聖賢言性不同。總皆一貫有。



對命而言者。命爲天所賦。性爲人所受。有對心而言者。心是性之充周。性是心之保合。有對情而言者。性是未發。情是已發。有對善而言者。善卽性之流行。性卽善之收斂。有對習而言者。性是孩提之初習。是教養之後。有指天命之本然而言者。是五德之中氣。所謂天下之大本者也。有兼人欲之雜而言者。是耳欲聲。目欲色。四肢之欲安佚之類。孟子所謂動心忍性者也。知其一貫而各不相混。性之說盡於此矣。○問易言繼之者善也。成之者性

也。聖人以性對善。可見性中無善。曰聖人言立人之道。曰仁與義。以義對仁。豈可言義中無仁。

物性

所謂氣性人與物同德性亦出于氣而氣性不必有德也

張子曰。天下凡謂之性者。如言金性剛。火性熱。牛之性。馬之性也。莫非固有。

朱子曰。以氣言之。則知覺運動。人物若不異。以理言之。則仁義禮智之稟。非物之所能全也。○又曰。知寒煖。識饑飽。好生惡死。趨利避害。人與物都一般。

朱子曰。虎狼之仁。豺獾之祭。蜂蟻之義。却只通得些。

子譬如一隙之光。至於獼猴形狀類人。便最靈於他物。只不會說話。○孟子言山之性。水之性。山水何嘗有知覺耶。若於此看得通透。卽知天下無無性之物。除是無物方無此性。若有此物。卽木燒爲灰。灰陰爲土。亦有此灰土之氣。既有灰土之氣。卽有灰土之性。安得謂枯槁無性也。○問曾見答余方叔書以爲枯槁有理。不知枯槁瓦礫如何有理。曰且如大黃附子。亦是枯槁。然大黃不可爲附子。附子不可爲大黃。○草木都是得陰氣飛走。都是得陽氣各分之草是得。

陰氣。木是得陽氣。故草柔而木堅。走獸是得陰氣。鳥是得陽氣。故獸伏草而鳥棲木。然獸又有得陽氣者。如猿猴之類是也。鳥又有得陰氣者。如雉鵲之類是也。唯草都是得陰氣。然亦有陰中陽。陽中陰者。○問動物有知。植物無知。何也。曰動物有血氣。故能知。植物雖不可言知。然一般生意。亦可默見。若戕賊之。便枯悴。不復悅懌。亦似有知者。嘗觀一般花樹。朝日照耀之時。欣欣向榮。有這生意。皮包不住。自迸出來。若枯枝老葉。便覺憔悴。蓋氣已行過也。

樂菴李氏曰。天地之性。人爲貴。宇宙之間。一切所有之物。皆具天地之性。虎狼有父子之仁。螻蟻有君臣之義。雕鳩有夫婦之別。鴻雁有兄弟之序。鷦鷯有朋友之情。若此者。豈非天地之性。而人獨爲貴者。何哉。物得其偏。人得其全也。

### 命

程子曰。天所賦爲命。人所受爲性。○問。上世人多壽。後世不及古。何也。莫是氣否。程子曰。氣便是命也。曰。今人不若古人壽。是盛衰之理歟。曰。盛衰之運。卒難

理會且以歷代言之。二帝三王爲盛。後世爲衰。一代言之。文武成康爲盛。幽厲平桓爲衰。以一君言之。開元爲盛。天寶爲衰。以一歲則。春夏爲盛。秋冬爲衰。以一月則。上旬爲盛。下旬爲衰。以一日則。寅卯爲盛。戌亥爲衰。一時亦然。如人生百年。五十以前爲盛。五十以後爲衰。然有衰而復盛者。有衰而不復反者。若舉大運而言。三王不及五帝之盛。兩漢不如三王之盛。又其下。不如漢之盛。至其中間。又有許多盛衰。如三代衰而漢盛。漢衰而魏盛。此是衰而復盛之理。譬如

月既晦則再生。四時往復來也。若論天地之大運舉。其大體而言。則有衰削之理。如人生百年。雖赤子纔生一日。便是減一日也。形體日漸長。而數自漸減。不相害也。○伊川與和靖論義命。和靖曰。命爲中人以下說。在聖人只有一個義。伊川曰。何也。和靖曰。行一不義。殺一不辜。而得天下。不爲也。奚以命爲。伊川大賞之。

問。命字有專以理言者。有專以氣言者。朱子曰。也都相離不得。天非氣。無以命於人。人非氣。無以受天所

命○問子罕言命。若仁義禮智信五常皆是天所命。如貴賤死生壽夭之命有不同。如何。曰。都是天所命。稟得精英之氣。便爲聖。爲賢。便是得理之全。得理之正。稟得清明者。便英爽。稟得敦厚者。便溫和。稟得清高者。便貴。稟得豐厚者。便富。稟得長久者。便壽。稟得衰頹薄濁者。便爲愚不肖。爲貧。爲賤。爲夭。天有那氣。生一個人出來。便有許多物隨他來。天之所命。固是均一。到氣稟處。便有不齊。只看其稟得來如何耳。又問得清明之氣。爲聖賢。昏濁之氣。爲愚不肖。氣之厚。



者爲富貴。薄者爲貧賤。此固然也。然聖人得天地清  
明中和之氣。宜無所虧欠。而夫子反貧賤。何也。豈時  
運使然也。抑其所稟。亦有不足耶。曰。便是稟得來有  
不足。他那清明也。只管得做聖賢。却管不得那富貴。  
稟得那高的。則貴。稟得厚的。則富。稟得長的。則壽。貧  
賤夭者。反是。夫子雖得清明者。以爲聖人。然稟得那  
低的薄的。所以貧賤。顏子又不如孔子。又稟得那短  
的。所以又夭。

楊謙曰。此言夫子稟得薄的低的。其說大誤。蓋聖

人皆得天地之中氣。堯舜正當中氣之升。夫子正當升極而降。所謂致至而反。龍蛇之蟄以存身也。在衆人以爲命有榮枯。在聖人只知有性。聖人但以所稟之五常推而行之。家之人悅之。國之人悅之。天下之人悅之。民被澤焉。則是聖人之命當貴也。當富也。天下之人之命當受五福也。以所稟之五常推而行之。家之人不能行。國之人不能行。天下之人不能行。動輒有阻。民不被澤焉。則是聖人之命當貧也。當賤也。天下之人之命當受諸禍也。

故君子行法以俟命。行法以俟命。乃所以立命也。使道與時違。而聖人略有求富貴之意。卽是不受命。非所以爲聖人。豈所性之外。又有低薄之氣。○性卽是命。聖賢生於亂世。只是他性不肯從亂。寧可貧賤。

問氣有清濁。有短長。其清者固所以爲賢。然雖清而短。則於數亦短。其濁者固所以爲愚。然雖濁而長。則其數亦長。不知果然否。朱子曰。此說得之。貴賤貧富亦是如此。

問富貴有命。如後世鄙夫小人。當堯舜三代之世。如  
何富貴。朱子曰。常堯舜三代之世。不得富貴。在後世  
則得富貴。便是命。曰。如此則氣稟不一定。曰。以此氣  
遇此時。是他命好。不過此時。便是背。所謂資適逢時  
是也。如長平死者四十萬。但遇白起。便如此。只他相  
撞着。便是命。○木生於山。取之或貴而爲棟梁。或賤  
而爲厠料。皆其生時所稟氣數如此定了。

北溪陳氏曰。天命卽天道之流行。而賦予於物者。就  
元亨利貞之理而言。則謂之天道。卽此道之流行賦

予於物者而言。則謂之天命。

# 心

程子曰。心一也。有指體而言者。寂然不動是也。有指用而言者。感而遂通天下之故是也。唯觀其所見如何耳。○問仁與心何異。曰。於所主曰心。名其德曰仁。○有是心。斯具是形以生。惻隱之心。人之生道也。雖桀跖不能無是以生。但戕賊之以滅天耳。始則不知愛物。俄而至於忍。安之以至於殺。充之以至於好殺。豈人理也哉。○耳目能視聽而不能遠者。氣有限也。

心無遠近。○人心常要活。則周流無窮而不滯於一隅。○問以赤子之心爲已發。是否。曰已發而去道未遠也。曰大人不失赤子之心。若何。曰取其純一近道也。曰赤子之心與聖人之心。若何。曰聖人之心明鏡止水。

揭謙曰。仁人心也。生生仁也。若但言聖人之心。明鏡止水。則去釋氏不遠。當曰聖人之心如日。

又曰。人心不得有所繫。○心定者。其言重以舒。不定者。其言輕以疾。○人心必有所止。無止則聽於物。惟

物之聽何所往而不妄也。○張天祺昔嘗言自約數年。自上著牀。便不得思量事。不思量事後。須強把他心來制縛。亦須寄寓在一箇形象。皆非自然。司馬君實自謂吾得術矣。只管念箇中字。此則又爲中所繫縛。且中字亦何形象。若愚夫不思慮。冥然無知。此又過與不及之分也。有人胸中常若有兩人焉。欲爲善。如有惡以爲之間。欲爲不善。又若有羞惡之心者。本無二人。此正交戰之險也。持其志使氣不能亂。此大可驗。要之聖賢必不害心疾。其他疾却未可知。

張子曰。心統性情。○由知覺有心之名。○心清時少。亂時多。其清時卽視明聽聰。四體不待羈束而自然恭謹。其亂時反是。○虛心然後能盡心。○心旣虛。則公平。公平則是非較然易見。當爲不當爲之事。自知龜山楊氏曰。六經不言無心。惟佛氏言之。亦不言脩性。唯揚雄言之。心不可無。性不假脩。故易止言洗心。盡性。記言正心尊德性。孟子言存心養性。

朱子曰。心主乎身。其所以爲體者。性也。所以爲用者。情也。是以貫乎動靜而無不在焉。○問五行在人爲



五臟然心却具得五行之理。以心虛靈之故否。曰心屬火。緣是個光明發動之物。所以具得許多道理。

揭謙曰。五行唯心位乎上中。所以有君象。

問先生嘗言心不是這一塊。某竊謂滿體皆心也。此特其樞紐耳。朱子曰。不然。此非心也。乃心之神明升降之舍。人有病心者。乃其舍不寧也。凡五臟皆然。揭謙曰。古聖人以爲心焉。得非心。但此中又有神明。神在此則明。不在此則不明。此爲明堂。乃布政之所也。

問程子曰。心本善。發於思慮。則有善不善。程子之意。是指心之本體。有善而無惡。及其發處。則不能無善惡也。胡五峯曰。人有不仁。心無不仁。先生以爲下句有病。如顏子。其心三月不違仁。是心之仁也。至三月之外。未免少有私欲。心便不仁。豈可直以爲心無不仁乎。其近以先生之意推之。莫是五峯不會分別得體與發處言之否。朱子曰。只爲他說得不備。若云人有不仁。心無不仁。心有不仁。心之本體無不仁。則意方足耳。

揚謙曰。觀程朱之論。言心之本體。無不善。發處有  
不善。夫心之體。性也。心之發。情也。則是性無不善。  
情有不善。然孟子言性善。皆驗於情之善。不言情  
有不善也。得無悖乎。曰。非悖也。孟子之言情善。謂  
德性發而爲道心。程朱之言情有不善。謂未發則  
聖凡皆中。已發則有中節。不中節。○當中氣之未  
發。是謂德性。當中氣之已發。是謂道心。均氣也有  
偏。則謂之氣性。不謂之德性。猶之均氣也有主。則  
謂之志。無主。則謂之氣。均人也。爲率。則謂之將。爲

從則謂之卒。未嘗不合乎氣而爲言也。中庸喜怒哀樂之未發已發是全論氣性。人心氣性之未發雖惡人未有不中。則未有不善。不悖乎德性。及其發而爲人心。則有中節不中節。遂分善惡。故曰人心唯危。

問心有善惡。朱子曰。心是動的事物。自然有善惡。且如惻隱是善也。見孺子入井。而無惻隱之心。便是惡矣。離著善便是惡。然心之本體未嘗不善。又却不可記惡。全不是心。若不是心。是甚麼做出來。

楊謙曰。若但論心。則聖人心善。惡人心不善。總論聖凡之心。則又有道心人心。道心全善。人心可流。而爲不善。論心統性情。則心之未發。卽性。卽無不善。發而爲情。始見道心人心之別。道心發於德性。人心發於氣性。德性道心全善。氣性人心則合道德者善。不合道德者不善。道心乃孟子所謂惻隱羞惡辭讓是非之心。人心乃樂記所謂喜心怒心哀心。樂心必如此說。心性方盡也。

朱子答方賓王曰。程子所謂雖無邪心。而不合正理。

者。實該動靜而言。如燕居獨處之時。物有來。或理所當應。而此心頑然固執不動。則雖無邪心。而只此不動處。便非正理。又如應事接物。理當如彼。而吾之所以應之者。乃如此。則雖未必出於有意之私。然只此亦是不合正理。

楊謙曰。未發以靜。故善。然止是未有感。而靜則無不善。若見入井而無惻隱之心。則感而不應。雖靜亦惡。所謂人如木石。則是不仁。然感而皆應。則有不義。宜應不應。亦爲不義。不知宜應不宜應。則是不義。宜應不應。亦爲不義。不知宜應不宜應。則是

不智應之無先後次序。則是無禮。此吾儒之言性。雖至靜時。亦脩四德也。宜靜而靜。所以爲生生之本也。

問靈處是心抑是性。朱子曰。靈處只是心。不是性。性只是理。

橋謙曰。性猶火種。心是有酸之火。性字從心。從生。所以生心也。赤子在胎。有性未有心。始生魄。陽始有知覺。是心之端。如火之始然。泉之始達。今日靈是心。非性。性只是理。未免誤也。

又曰。饑欲食。渴欲飲者。人心也。得飲食之正者。道心也。人心如卒徒。道心如將。○陳安卿問。人心是个靈的物。如日間未接應之前。固是寂然未發。於未發中。固常恁地惺。不恁瞋然不省。若夜間有夢之時。亦是此心之已動。猶晝之有思。如其不夢未覺。正當大寐之時。此時謂之寂然未發。則全沉沉瞋瞋。萬事不知不省。與木石蓋無異。與死相去亦無幾。不可謂寂然未發。不知此時。心體何所安存。所謂靈的。何所寄寓。聖人與常人所以異者。於此時如何而學者。工夫此。



時又何以爲驗也。朱子曰。寤寐者。心之動靜也。有思無思者。又動中之動靜也。有夢無夢者。又靜中之動靜也。但寤陽而寐陰。寤清而寐濁。寤有主而寐無主。故寂然感通之妙。必於寤而言之。又問。竊謂人生具有陰陽之氣。神發於陽。魄根於陰。心也者。則麗陰陽而乘其氣。無間於動靜。卽神之所會而爲魄之主也。晝則陰伏藏而陽用事。陽主動。故神運魄隨而爲寤。夜則陽伏藏而陰用事。陰主靜。故魄定神蟄而爲寐。神之運故虛靈知覺之體。熠然呈露。有苗裔之可尋。

如一陽復後。萬物之有春意焉。此心之寂感。所以爲有主。神之蟄。故虛靈知覺之體。沉然潛隱。悄無踪跡。如純坤之月。萬物之生性。不可窺其朕焉。此心之寂感。所以不若寤之妙。而於寐也。爲無主。然其中實未嘗氓。而有不可測者存。呼之則應。驚之則覺。是則亦未嘗無主。而未嘗不妙也。故自其大分言之。寤陽而寐陰。而心之所以爲動靜也。細而言之。寤之有思者。又動中之動。而爲陽之陽也。無思者。又動中之靜。而爲陽之陰也。寐之有夢者。又靜中之動。而爲陰之陽

也。無夢者。又靜中之靜。而爲陰之陰也。又錯而言之。則思之有善與惡者。又動中之動。陽明陰濁也。無思而善應與妄應者。又動中之靜。陽明陰濁也。夢中有正與邪者。又靜中之動。陽明陰濁也。無夢而易覺與難覺者。又靜中之靜。陽明陰濁也。一動一靜。循環交錯。聖人與衆人則同。而所以爲陽明陰濁則異。聖人於動靜。無不一於清明純粹之主。而衆人則雜焉而不齊。然則人之學力所係。於此亦可以驗矣。曰得之。搗謙曰。所論動靜甚明。至善惡則仍在中與不中。

不在陰陽。

問橫渠云。心要洪放。又曰。心大則百物皆通。心小則百物皆病。孫思邈云。膽欲大而心欲小。竊謂橫渠之說。是言心之體。思邈之說。是言心之用。未知是否。朱子曰。心自有合要大處。有合要小處。○問心如何能通以道。使無限量。曰。心不是橫開硬迸教大得。須是去物欲之蔽。則清明而無不知。窮事物之理。則脫然有貫通處。○問程子曰。有主則實。又曰。有主則虛。如何分別。朱子曰。只是有主於中。外邪不能入。自其有

主於中言之。則謂之實。自其外邪。不入言之。則謂之虛。○有主則實。既言有主。便已是實了。似多了一實字。

象山陸氏曰。人之於耳。要聽卽聽。不要聽則否。於目亦然。何獨於心。而不由我乎。○又曰。人心只愛去泊着事。教他棄事時。更無住處。○又曰。天之所以予我者。至大至剛。至直至平。至公如此。私小做甚底人。須是放教此心公平正直。無偏無黨。王道蕩蕩。勉齋黃氏曰。人惟有一心。虛靈知覺者是也。心不可

無歸藏。故有血肉之心。血肉之心。不可無歸藏。故有  
此身體。身體不可無所蔽。故須裘葛。不可無所寄。故  
須棟宇。其主只在心而已。今人於屋宇身體衣服。反  
切切求過人。而心上却全不理會。

北溪陳氏曰。心至靈至妙。可以爲堯舜參天地。格鬼  
神。雖萬里之遠。一念便到。雖千古人情事變之秘。一  
照便知。雖金石至堅可貫。雖物類至幽至微可通。  
西山真氏曰。北辰常不移。故能爲列宿之宗。人心常  
不動。故能應萬物之變。不動非無所運用之謂也。順

理而應不隨物而遷。雖動猶靜也。○大舜十六字。開萬世心學之源。後之聖賢更相授受。雖若不同。大抵教人守道心之正。而遏人心之流耳。孟子於仁義之心。則欲其存而不放。本心欲其不喪。赤子之心。欲其不失。凡此皆所謂守道心之正也。易言懲忿窒慾。孔子言克己。大學言忿懣恐懼好樂憂患。則不得其正。孟子言寡欲。以小體之養爲戒。以饑渴之害爲喻。凡此皆所謂遏人心之流也。心一而已耳。由理義而發。無以害之。可使與天地參。由形氣而發。無以檢之。至

於達禽獸不遠。始也特毫毛之間。終焉有霄壤之隔。此精一之功。所以爲理學之要歟。

臨川吳氏曰。心學之妙。自周子程子發其秘。學者始有所悟。以致其存存之功。周子云。無欲故靜。程子云。有主則虛。此二言者。萬世心學之綱要也。不爲外物所動之謂靜。不爲外物所實之謂虛。

馮謙曰。居心之要在於無欲有主。而不在於靜虛。所謂外物只是邪耳。若一味虛靜。而欲扞外物。則必流於空寂。○今人處於末俗。功利名譽愛憎怨。



欲紛然於心而欲從事聖人。求其本心。如種苗草中。必無長理。善農者必芟夷蘊崇。使蠹賊莠稗。不得釀種。然後植之嘉穀。灌溉培養。皆有大益。故善教者。使人求其放心。必先觀其立志。其人果志於學。必先杜其計功謀利之心。然後從事於學。則學有益矣。不然。多聞多見。適足長其蠹賊而已。○養心莫善於齋。齋者七情皆不致思。唯精唯一。故古人敬事必齋。以齊其不齊之思。易曰。齋戒以神明其德。○後儒以無意爲無心。以其無心。學聖人之

無意故放心而不知求。○天氣時盈。日者天之中  
精。所以節氣而歸之中也。人之有心。亦所以節氣  
之差。允執其中。治心之法也。○心不動則熄。過動  
則自焚。易曰。復其見天地之心。動而以順行。善動  
之道也。○釋氏言性體。周遍法界。又曰。心徧十方。  
視父母所生之身。如一微塵。後世儒者。不曾反身  
而求。多見他說得精微廣大。每相襲說。橫渠極詆  
佛學。然亦有散入無形。適得吾體之說。陳經正問  
伊川曰。據貴一所見。盈天地間。皆我之性。更不復

知我身之爲我。伊川笑曰。他人食飽。公無餒乎。蓋  
儒者之道。只以神明之主於身者爲心。心之體爲  
性。心性無一定不變之形。故曰神無方而易無體。  
然確有典常。允執其中是也。○天心不息。亦不動。  
亂動者。人間凡火而已。

情

程子曰。情者。性之動也。

撝謙曰。情有二。有但從德性出者。性之仁發而爲  
惻隱。其情屬木。氣性之禮發而爲恭敬。其情屬火。

氣性之義發而爲羞惡其情屬金氣性之智發而爲是非其情屬水氣有兼氣性出者春之情爲喜秋之情爲怒夏之情爲樂冬之情爲哀亦屬四氣所謂道心如將人心如卒者也

問喜怒出於外如何程子曰非出於外感於外而發於中也問性之有喜怒猶水之有波否曰然湛然平靜如鏡者水之性也及遇沙石地勢不平便有湍激或風行其上便爲波濤洶洶此豈水之性也哉伊大率以說而動安有不失正者○張子問定性未能不

動猶累於外物何如明道先生答曰所謂定者動亦定靜亦定無將迎無內外苟以外物爲外牽已而從之是以已性爲有內外也且以性爲隨物於外則當其在外時何者爲在內是有意於絕外誘而不知性之無內外也既以內外爲二本則又烏可遽語定哉  
撓謙曰以吾儒言性只是在內而能應於外非無內外也凡累於外物者只是已性爲外物所動而亂其體非能在外也此篇言性無內外只是說性不枯於內不役於外非如釋氏所謂性空周徧法

界○按朱子謂此性字說得也。詫異是個心字意。蓋朱子從伊川以性爲理。故疑此書性字反以爲異。明道只以性爲心之體也。性能具理而非卽理。釋氏於性本有見。只不曾認得人性。又不知性之變化。

夫天地之常以其心普萬物而無心。聖人之常以其情順萬事而無情。故君子之學莫若廓然而大公。物來而順應。易曰。貞吉悔亡。憧憧往來。朋從爾思。苟規規乎外誘之際。將見滅於東而生於西也。非唯日之

不足顧其端無窮不可得而除也。

楊謙曰。廓然而大公。物來而順應。此理精醇。然但是成德後方能如此。若初學定性之方。只夫子語顏淵。仲弓爲仁處。與樂記姦聲亂色。不留聰明。淫樂慝禮。不接心術。惰慢邪僻之氣。不設於身體。使耳目口鼻心知百體。皆由順正以行其義。一段最善如此久久。自然性定。所以朱子說此一篇之中。都不見一個下手處。童翬卿曰。廓然而大公。物來而順應。這莫是下工處否。曰。這是說已成處。且如

今人私欲萬端紛紛擾擾無可柰何。如何得他大公所見與理都是背馳。如何得他順應。楊道夫曰。這便是先生前日所謂也。須存得這個在。曰。也不能。由你存此心紛擾。看甚方法。也不能得他住。須是知得天下之理。都著一毫私意不得。方是知止。而后有定也。看朱子此等處。直能明於人情。是後學模範。

人之情。各有所蔽。故不能適道。大率患在於自私。而用智。自私則不能以有爲。爲應迹。用智則不能以明。



覺爲自然。今以惡外物之心而求照無物之地。是反鑑而索照也。

搗謙曰。以有爲爲應迹一語。近於釋氏所云一切有爲法。如夢幻泡影者。若吾儒則視一切有爲法。皆吾性中肫肫其仁所經綸之事。心與迹一也。文中子曰。心迹之判久矣。伊川曰。記道。朱子言此明道在鄠作年甚少。然則行狀所謂出入於老釋者。幾十年。其在斯時乎。

易曰。艮其背。不獲其身。行其庭。不見其人。

爲謙曰。此四句引與易意不同。

孟氏亦曰。所惡於智者。爲其鑒也。與其非外而是內。不若內外之兩忘也。兩忘則澄然無事矣。無事則定。定則明。明則尚何應物之爲累哉。聖人之喜。以物之當喜。聖人之怒。以物之當怒。是聖人之喜怒。不係於心。而係於物也。是則聖人豈不應於物哉。烏得以從外者爲非。而更求在內者爲是也。今以自私用智之喜怒。而視聖人喜怒之正。爲何如哉。夫人之情。易發而難制者。唯怒爲甚。第能於怒時。遽忘其怒。而觀理。

之是非亦可見外誘之不足惡。而於道亦思過半矣。  
朱子曰。定性一章。明道言不惡事物。亦不逐事物。今  
人惡則全絕之。逐則又爲物引將去。惟不拒不流。泛  
應曲當。則善矣。

問聖人定處未詳。朱子曰。知止而後有定。只看此一  
句便了得。萬物各有當止之所。知得則此心自不爲  
物動。曰舜號泣于旻天。象憂亦憂。象喜亦喜。當此時  
何以見其爲定。曰此時當應而應。當應而應。便是定。  
若不當應而應。便是亂了。當應而不應。則又是呆了。

○人情易發而難制者。惟怒爲甚。惟當於怒時。遺忘其怒。而觀理之是非。纔見已是而人非。則其爭愈力。後來看不如此。如孟子所謂我必不仁也。其自反而仁矣。其橫逆由是也。則曰此亦妄人也已矣。○問聖人恐無怒容否。朱子曰。怎生無怒容。合當怒時。亦必形於色。如要去治那人之罪。自爲笑容。則不可。曰如此。則恐涉忿厲之氣否。曰天之怒。雷霆亦震。舜誅四凶。當時亦須怒。但當怒而怒。便中節。事過便消了。更不積。

魯齋許氏曰。七情一有動於心。氣便不平。氣既不平。則發言多失。七者之中。唯怒爲難治。又偏招患難。須於盛怒時。堅忍不動。俟心氣平時。審而應之。庶幾無失。

楊謙曰。自發於情。而性之剛柔乃見。剛者易失於忿。柔者易流於欲。○哀怒傷性。甚易知。喜樂之傷性。則使人不覺。孝經言毀不滅性。性卽天命之中。四情之過。皆能滅性。樂記言物至而人化物者。喜樂之滅性也。又曰。言性貴本於中。言情貴得其正。

○定情處。朱子雖云知得此心。自不爲物動。終要操持得久。仁不能守。雖知也要動。

意

問意是心之運用處。是發處。朱子曰。運用是發了。問情亦是發處。何以別。曰。情是性之發。情是發恁地。意是主張要恁地。如愛那物是情。所以去愛那物是意。情如舟車。意如人去使舟車一般。

楊謙曰。情不必動意。

志

朱子曰。志是心之所之。一直去的。意又是志之經營往來的。凡營爲謀度往來皆意也。

搗謙曰。經營往來皆思也。未可謂意。

問意志。朱子曰。橫渠云。以意志兩字言。則志公而意私。志剛而意柔。志陽而意陰。○志是公然主張要做事底意。是私地潛行間發處。志如伐。意如侵。

搗謙曰。志是有定之意。意是無定之志。如心中偶欲發一言。此不是志。亦不是情。亦不是思。但是意。橫渠志公意私之說。止是論語無意之意。若大學

誠意之意。則不過動一念耳。○情是性交於物意。則不必緣物而動。只是心之所發。

問人有少而勇。老而怯。少而廉。老而貪。何爲其然也。程子曰。志不立。爲氣所使故也。志勝氣。則一定而不可變也。曾子易簣之際。其氣微可知也。惟其志旣堅定。則雖死生之際。亦不爲之動也。況老少之異乎。

北溪陳氏曰。論語曰。博學而篤志。立志要定。不要雜。要堅。不要緩。如顏子曰。舜何人也。予何人也。有爲者亦若是。若曰文王我師也。周公豈欺我哉。皆以聖人



自期皆是能立志。孟子曰。舜爲法於天下。可傳於後世。我猶未免爲鄉人也。是則可憂也。憂之如何。如舜而已矣。孟子以舜自期。亦是能立志。

思

程子伊曰。思曰睿。睿作聖。致思如掘井。初有渾水。久後稍引。動得清者出來。人思慮始皆涸濁。久自明快。○思如湧泉。浚之愈新。○思慮不得至於苦。○要息思慮。便是不息思慮。○不深思。則不能造於道。不深思而得者。其得易失。○欲知得與不得。於心氣上驗。

之思慮有得。中心悅豫。沛然有裕者。實得也。思慮有得。心氣勞耗者。實未得也。強操度耳。○未有不能體道而能無思者。○呂與叔嘗言。患思慮多。不能驅除。程子二曰。此正如破屋中禦寇。東面一人來。未逐得。西面又一人至矣。左右前後驅逐不暇。蓋其四面空疎。盜固易入。無緣作得主定。又如虛器入水。水自然入。若以一器實之以水。置之水中。水何能入來。蓋中有主則實。實則外患不能入。自然無事。○問思慮雖多。果出於正。亦無害否。曰。且如在宗廟則主敬。朝廷

主莊軍旅主嚴。此是也。如發不以時。紛然無度。雖正亦邪。○蘓季明問。晒常患思慮不定。或思一事未了。他事如麻又生。如何。曰。不可。此不誠之本也。須是習。習能專一時。便好。不拘思慮與應事。皆要求一。○伊思曰。睿思慮久後。睿自然生。若於一事上思未得。且別換一事思之。不可專守着這一事。蓋人之知識。於這裏蔽着。雖思亦不通也。○纔思便是已發。問程子曰。要息思慮。便是不息思慮。朱子曰。思慮息不得。只敬便都沒了。

臨川吳氏曰。常人非無思而不見其有得。何也。不思其則是謂妄思。惡有妄思而可以有得者哉。思必於其則而後爲思之正。則必於其得而後爲思之成。則也者。帝之衷。民之彝。性分所固有。事理之當然也。稽諸夫子之言。無邪其綱。九思其目也。無邪者心之則。曰明曰聰曰溫曰恭曰忠曰敬者。視聽色貌言事之則也。思之思之。其有不得之者乎。

撝謙曰。臨學而近思。臨事而再思。平居而儼若思。可謂知止矣。

才

問伊川論才。與孟子言才有曰。非才之罪也。又曰。不能盡其才者也。又曰。非天之降才爾殊也。又曰。以爲未嘗有才焉。如孟子之意。未嘗以才爲不善。而伊川却說才有善不善。其言曰。氣清則才善。氣濁則才惡。又曰。氣清則才清。氣濁則才濁。意者以氣質爲才也。以氣質爲才。則才固有善不善之分矣。而孟子却止以才爲善者。何也。朱子曰。孟子與伊川論才。則皆是。孟子所謂才。止是指本性而言。性之發用。無有不善。

處。如人之有才。事事做得出來。一性之中。萬善完具。  
發將出來。便是才也。便如惻隱羞惡。是心也。能惻隱  
羞惡者。才也。如伊川論才。却是指氣質而言也。

性理大中卷之十終